

## **Protocol dalla radunonza communal dils 25 da november 2016 allas 20.15 uras en casa da scola a Breil-vitg**

**Perstgias:** Marcus Brunner, cusseglier  
Veronica Cathomen, cussegliera  
Richard Caduff, anteriur president communal  
René Cavegn,

**Presenza:** 53 personas

**Hosps:** Ursin Fetz, HTW Cuera (tractanda 2)

**Tractandas:**

1. Beinvegni ed approbaziun dil protocol dalla radunonza dils 27 da november 2015
2. Orientaziun project da fusiun Breil/Vuorz/Andiast
3. Preventiv e quen d'investiziun 2017
4. Pei da taglia 2017
5. Varia

### **Beinvegni ed avertura**

Il president communal, Clau Schlosser, fa a tuts presents in cordial beinvegni, in spezial beinvegni fa el ad Ursin Fetz dalla HTW, el vegn ad orientar la radunonza sur dil project da fusiun B/V/A. Il president orientescha la radunonza sur dil curriu e passau el davos onn en vischnaunca.

- avertura luvratori communal Bostg
- avertura dalla punt nova a Tavanasa
- la regenza ha approbau la revisiun dil plan da zonas
- illuminaziun casas da scola Breil, Dardin e Danis sin LED
- illuminaziun da vias a Mutteins, Tavanasa e Danis sin LED
- deplazzau las tablas d'entrada a Breil e Dardin
- reducziun da tempo sin 60 a Mutteins
- sanaziun da diversas vias en vischnaunca cun provediment d'aua

Ei dat era projects che ein aunc buca vegni fatgs. Cheu ei il Passadi Mutteins – Danis, il qual sa buca vegnir construius sco previus, cun quei che in possessur dat buca la lubientscha da passar atras sia parcella. Cheu ha la suprastanza survegniu l'incumbensa dil cussegli da vischnaunca da sclarir ina nova varianta. La sanaziun dalla Via Patnasa ha stuiu vegnir stuschada sin il proxim onn, cun quei ch'igl ei vegniu pli car che previu.

Sco dumbravuschs vegnan Aluis Defuns, Breil e Tarcisi Livers, Breil, nominai ed elegi unanim.

La gliesta da tractandas, ch'ei stada publicada eis davos fegls ufficials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

### **1. Approbaziun dil protocol dalla radunonza communal dils 27 da november 2015**

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol vegn per consequenza approbaus entras tscherna unanima.

## 2. Orientaziun project da fusiun Breil/Vuorz/Andiast

Las vischnauncas da Breil, Vuorz e Andiast ein vidlunder d'elavurar ora il contract da fusiun. Ursin Fetz dalla HTW orientescha la populaziun sur dil project da fusiun. El menziunescha en spezial tgei che vegn adattau en quei contract. Proxima primavera vegn ei a da ina orientaziun cun la presentaziun dil contract da fusiun per l'entira populaziun da Breil/Vuorz e Andiast. La votaziun vegn ad haver liug el decuors dil matg/zercladur 2017. En vigur duess la fusiun ir cun igl 1 da schaner 2018.

Ursin Fetz menziunescha ch'ina gruppa da lavur vegni ad ellaborar ora il contract da fusiun. Novas informaziuns visavi il vegl contract d'avon quatter onns, dat ei buc.

Sin las damondas fatgas sa vegnir dau risposta. Differents votums vegnan aunc scalri giu en la gruppa da lavur.

## 3. Preventiv e quen d'investiziun 2017

Il preventiv siara suenter expensas da frs. 8'694'900.00 ed entradas da frs. 8'739'050.00 cun in surpli entradas ell'altezia da frs. 44'150.00. Las amortisaziuns previdas muntan a frs. 900'000.00. Il quen d'investiziun preveda expensas da frs. 1'710'000.00 ed entradas da frs. 460'000.00. Las investiziuns netto muntan per consequenza a frs. 1'250'000.00.

Il president communal resumescha il preventiv dil quen current sco era il quen d'investiziun e dat sclariments necessaris tier diversas posiziuns. Allas damondas tschentadas vegn dau cuortamein risposta. Ils presents approbeschan il preventiv sco era il quen d'investiziun 2017 cun tscherna unanima e senza resalvas.

## 4. Pei da taglia 2017

La suprastonza communal ed il cussegl da vischnaunca ein sefatschentai cun la damonda e proponan alla radunonza communal da schar il pei da taglia ordinari sco tochen dacheu, v.d. sin 100% dalla taglia cantunala semplia. Era il pei dalla taglia sin schischom duei restar sco tochen dacheu sin 1.7%.

Las damondas vegnan suttamessas alla discussiun. Da tala vegn buca fatg diever. Cun tscherna unanima decida la radunonza communal da fixar il pei da taglia ordinari sin 100% dalla taglia cantunala semplia ed il pei dalla taglia sin schischom sin 1.7%.

## 5. Varia

Ord il miez vegn giavischau d'erreger parcadis a S. Giacun sco era ina suosta per quels che spetgan sin igl auto da posta. La suprastonza vegn a sclarir giu, sche l'errecziun da parcadis ei insuma pusseivla e sch'ei drova insuma ina suosta.

In vischin fa la proposta d'erreger en mintga vischinadi ina fossa comunabla. Cun quei ch'il santeri ei caussa da vischnaunca, vegn la suprastonza a sclarir giu il plaz en mintga vischinadi. Si Breil ei previu ina fossa comunabla ensemen cun la renovaziun dalla baselgia. En quei connex vegn sclariu giu sch'ei fuss pusseivel da metter en ina cumissiun che sedat giu cun quella tematica.

In vischin fa la damonda daco ch'el hagiun survegniu il quen dalla taxa turistica 2015 e 2016 enteifer ina jamna. Il president communal sa informar daco che quels quens ein vegni tarmess enteifer aschi cuort temps. Vinavon menziunescha il president, sch'enzatgi sappi buca pagar quels quens enteifer il termin, duei el s'annunziar sin canzlia per prolunghir il termin da pagament.

Clau Schlosser engrazia per la presenza, la partecipaziun e la confidonza e siara la radunonza allas 21:40 uras, giavischond in bi temps d'advent sco era ina buna finiziun digl onn vegl.

Breil, 28 da november 2016

**Il president**

Handwritten signature in blue ink, appearing to read "Alan Schür".

**Igl actuar**

Handwritten signature in blue ink, appearing to read "Alan".